

Iroun Beretitenti
Henry B. Eyring

Moan Kauntira n te
Moan Beretitentii



Utu ao te Tataro

Te taina, ngke I tekateka irarikin ana kainiwene tamau inanon te tairiki, e karakina aron uarerekena. E taekina aia tangira ana karo inanon taai ni kanganga ao aron ana tangira Tamana are i Karawa ao te Tia Kamaiu. I ataia bwa e mamaara n aorakina ae te kaentia, ngaia are I aki irua n arona n taai akanne ni ikota ana namakin ibukin Tamana are i Karawa ma ana tangira ao ana akoi ana karo iaon te aba. E aki toki n taekinna tamau bwa ngkana e tataro, e taku bwa e kona n noora ao n iangoa moangaren Tamana are i Karawa nakoina.

Ana karo a reireinna man te katoto n tataro n aron ae angkoa e taetae nakon te Atua ao bwa te Atua e na kaeka inanon te tangira. E kainnanoa te katooto anne ni karokoa tokin maiuna. Ngkana e a moanna ni korakora te maraki, ti a kunea ni katorobubua iaon bubuaniwaena n te moanangabong irarikin ana kainiwene. Akea korakorana n okira ana kainiwene. E tuangiira e a kaman taatataro ni butia Tamana are i Karawa bwa bukin tera e a rang korakai ngke e kataia n rangin raoiroi n taainako. E taetae n akoi te kaeka are e roko: "te Atua e kainnanoia naati mwaane aika ninikoria."

Ao ngaia are e a teimatoa ni ua te toki, n onimaki bwa te Atua e tangiria, e kakauongo nakoina, ao ni boutokaia. E kakabwaiaki ni kaman ataakina mai moana ao n aki mwaninga bwa te Atua ae tangira e kona ni karoko irouna man ana tataro.

Anne bukina ngkai te Uea e reireiniia kaaro, "Ao a na reireiniia naba natia bwa a na tataro, ao n nakonako n ae eti imatan te Uea" (D&C 68:28).

Ana euangkerio Iesu Kristo e a tia ni kaokaki—ma ana Boki Moomon ao kiingin te nakoanibonga ni kabane are e kona ni kabaeiia utu—ibukina bwa ngke te ataeinimwaane Iotebwa Timiti e tataro n onimaki. E kareka te onimaki anne man ana utu ae tangira ao ni kakaonimaki.

Uabwi te ririki n nako te Uea e anganiia utu te reirei aei ibukin "Te Utu: Te Katanoata nakon te Aonaaba" man te Moan Beretitenti ao te Kooram n Abotoro ake Tengaun ma Uoman: "Taian mare ao utu aika tokanikai a kateaki ao ni kamatoaki iaon reirein te onimaki, te tataro, te rairannano, te kabwarabure, te karinerine, te tangira, te nanoanga, te mwakuri, ao waaki ni bobootaki aika kakukurei."¹

Ti riai ni kamwaita ara kakaitau nakoia ana utu te Burabeti ae Iotebwa Tiimiti ibukin kaikawaakina ae nako-raoi. Ana utu a aki tii kaota te onimaki ma te rairannano naba, te kabwarabure, te karinerine, te tangira, te nanoanga, te mwakuri, ao waaki ni bobootaki aika kakukurei.

Te roro ake a roko imwiim a na araniko bwa ko a kakabwaiaki ibukin am katoto n te tataro inanon am utu. Ko na bae n aki karikirakea ana toro ae kakannato te Atua, ma ko konaa man am tataro ao am katooto ibukin am kakao-nimaki ni buoka te Uea Iesu Kristo ni kateirakea ana reirei ae tamaroa man tangiraki.

Man bwaai ni kabane ake ko rinei ni karaoi ni buoka te Uea, te tataro e bon boboto mai iai. Iai aomata ae taneiai te aba mangaiia aika ota, ngkana a tataro, n anai nanoia tabeman ni kaurei mataia n nooria bwa antai ae a tataro nakoina. Ko kona n riki bwa te aekaki n aomata anne.

Iangoia bwa tera ae nanonaki n anne nakoia naake a katorobubua ma ngkoe n te tataro n utu. Ngkana a na namakinna bwa ko taetae nakon te Atua n te onimaki, e na rikirake aia onimaki bwa a aonga ni kona n taetae naba ma te Atua. Ngkana ko tataro ni karabwa te Atua ibukin taian kakabwai a ataia bwa a kaoti, aia onimaki e na rikirake bwa te Atua e tangiriia ao E kaekai ami tataro ao ni kaekai naba aia tataro. Anne e kona n riki n te tataro n utu tii ngkana ko a tia n rinanon anne n am tataro ae onoti, n taai aika mwaiti.

I bon teimatoa ni kakabwaiaki ibukin aroia au karo ma tinau n tataro nakon te Atua. Aia katooto ni mwaakan te tataro inanon te utu e bon teimatoa ni kakabwaiia rooro ake a na roko imwiia.

Natiu ao tibu a kakabwaiaki ni katoa bong man aia katoto au karo. Te onimaki bwa te Atua n tangira e ongo ao e kaekai tataro ake a kaman bwaatinaki nakoia. Ko kona ni karika te aekaki ni bwaibwai anne n am utu. I tataro bwa ko kona.

TE BWAI AE E NA TARAAKI

1. "Te Utu: Te Katanoata nakon te Aonaaba," *Riaona*, Nobembwa 2010, 129.

BUKAMARUA TE KA 20 NI KANURING IBUKIN TE KATANOATA IAON TE UTU

"Te Utu: Te Katanoata nakon te Aonaaba" e reiakin taian reirei ake a kaineti ma ake ti rinanona n te bong aei n aron are e moan karaoaki n Tebetembwa 23, 1995. Iangoia ni kaoia aomata ke utu ake ko reireinii bwa a na bukamarua te ka 20 ni kauring ibukin te katanoata man:

1. Korei ni karinani taian reirei ake inanona ake a bongana ibukiia. (Taraia bwa e kanga Beretitenti Eyring ni karaoa aei ma te tataro n te rongorongo ane ieta.)
2. Maroroakinna bwa a kanga reirei n tatabeua ni kona ni kakabwaiia n te bong aei ao n taai aika a na roko.
3. Barongai kouru aika onoti ni karin reirei akanne inanon maiuia ao n tibwai ma tabeman.

KAIRAKE

Mwakuri ni Karikirakea ni Katamaroa aron te Aomata n Tataro

Ereirei Beretitenti Eyring bwa e kona ni kakabwaiaki am utu man am reitaki ae matoatoa ma te Tama are i Karawa. Ko kona ni kanakoraoa am reitaki ma Ngaia man kanakoraoan am tataro! Aikai tabeua iango bwa e kanga karaoana:

Imwaain ae ko waakina am tataro, anaa tabeua te tai n iangoia bwa tera ae ko na taekinna. Iango titiraki ake ko karekei ke bwaai ake a katabetabeko—ko kona naba ni korei bwa ko aonga n aki mwaninga. Kamanena naba te tai aei ni kaitiaki mangaongaon baike a riki n te bong bwa ko aonga n kabanea nanom iaon ana kanamakin te Tamnei ae Raoiroi. Ngkana e tiationako am iango ngkana ko tataro, kataia ni iangoa te Tama are i Karawa ni kakauongo. Tataro ibukin baika a onoti. Arona naba, katuka tabeua te miniti ni banen am tataro ni ongora n ana wirikiriki te Tamnei. Ko na bae ni korei am namakin inanon am tienoro.

Uringnga bwa te tataro bon rinanin te mwakuri, ngaia are tai raraoma ngkana e anaa te kataneiai ke e na taraa ni kanganga! Am konabwai e kona ni buokiko ni karikirakea am reitaki ma te Atua are e na kakabwaiia rooro.

ATAEI

Te Kauring n Tataro

Ereirei Beretitenti Eyring bwa e kakawaki bwa ko na tataro ma am utu. Ko kona n riki bwa te katooto nakon am utu man am tataro ni katoa bong. Ko kona naba ni kauringia am utu bwa a na bootaki n tataro ni katoa bong. Uringa te taeka aei man ana maroro Beretitenti Eyring: "E ongo am tataro te Tama are i Karawa. E Tangiriko E ataa aram" ("Reitinakon te Kaotioti," *Riaona*, Nobembwa. 2014, 73). Korea te taeka aei iaon te kaati ke te mwakoro ni beebea ao kaaki n te tabo ike a kona n nooria iai am utu ae bwanin. Aei te anga ae ko kona n uringnga n taainako bwa te Tama are i Karawa e kan ongo mairoum!



Anuan lesu Kristo: E mwaaka ao e Onrake n te Mimitong

Tataromuaaka ni kamatebuiaia te buai n reirei aei ao n ukoria bwa ko aonga n ataia bwa tera ae ko na tibwaia. E kanga ataakin anuan te Tia Kamaiu ni karikirakea am onimaki Irouna ao ni kakabwaiaia naake ko tararuiaia rinanon te reirei ni kakawari? Ibukin rongorongona riki tabeua, nakon reliefsociety.lds.org.

Onimaki, Utu, Buoka

Aio mwakoron Rongorongan te Reirei ni Kakawari are e kaota iai anuan te Tia Kamaiu.

Areireiniira booki aika tabu bwa Iesu Kristo “e karekei mwaaka ni kabane, i karawa ao iaon te aba, ao e mena mimitongin te Tama irouna” (D&C 93:17). E taku Unimwanee M. Russell Ballard man te Kooram n Abotoro ake Tengaun ma Uoman bwa man te mwaaka aei ara Tia Kamaiu e karika karawa ao aonaaba, e karaoi kakai, ao n rinanon te maraki i Ketetemwane ao te Tabo n Tabwanou.¹ Ngkai ti a mataata n aei, e na karikirakeaki ara onimaki iroun Kristo, ao ti na rangin korakora riki.

Ngkai ti karaoi ao ni kawakin berita aika tabu n te tembora, te Uea e na kakabwaiaira ma Mwaakana. Linda K. Burton, te Beretitenti ni Kabuta n te Bootaki n Aine, e taku: “Kawakinan berita aika tabu e ka-rekeia te korakora, te mwaaka, ao te kamanoaki. . . I a tibwa kaitibo ma raoraou ae tangiraki ae boou. E kakoaua bwa imwiin karekan

ana entaumente n te tembora, e namakina te kakorakoraaki ma te mwaaka n totokoi taian kariiri.”²

E kaota koauan mwaakan te berita ae tabu Nibwaai: “Ngai, ae Nibwaai, I a noora korakoran mwaakan Ana Tiibu te Teei te Atua, ae ruo . . . iaoia ana aomata inanon te berita ae tabu te uea, . . . ao a irianaki n te raoiroi ma mwaakan te Atua ao te mimitong ae korakora” (1 Nibwaai 14:14).

Rakan riki Booki aika Tabu

Ieremiah 51:15; Te Kaotioti 1:6; Iakobwa 4:6–7; Motiae 3:17

Man Koroboki aika Tabu

Ibukin ana nanoanga ae moan te korakora ibukin Maretia ao Maria, Iesu Kristo e kateirakea mwaaneia ae Rataro man te mate man mwaakan te Atua are Irouna.

E roko Iesu n ana auti Maretia ao Maria imwiin menan Rataro n te ruanimate inanon abong te bong. A nako n ruanimate Rataro, ao e tua Iesu bwa e na nako te atibu are

rabunan te mataroa. E taku Iesu nakon Maretia, “Tiaki I taku nako im rimoa, ba ngkana ko onimaki, ao ko nora m’akan te Atua iai?” Ngkanne E a tatato nakon te Atua te Tama ao “e taetae n te b’ana ae korakora, Rataro, oti mai.

“Ao e oti nako teuare e mate, ao a kabaeaki baina ao waena n te kunnikai.” Taraa Ioane 11:1–45. Te Uea E kamanena mwaakana ni kamaiuira ao ni kakorakoraira. Ara onimaki Irouna e na rikirake ngkai ti uringnga bwa E onrake n te mwaaka ao te mimitong.

BWAAI AIKA A NA TARAAKI

1. Taraa M. Russell Ballard, “Aio Au Mwakuri ao Mimitongiu,” *Riaona*, Meei 2013, 18.
2. Linda K. Burton, “Te Mwaaka, Kimwareirei, ao Tangiran Kawakinan Berita aika Tabu,” *Riaona*, Nobembwa, 2013, 111.

Iangoa Aio

E kanga mwaakan te Atua ni kataniira ma te mwaaka ao te mimitong?